

Lé Coucou par P W Luce

I' n'y'a pas d'doute qu'ous avez ouï
Ch't ouaïsé qui fait tréjous l'même brit,
Car ch'est dé li qu' nou ouait lé cri:
Coucou ! Coucou!

Nou n'peut jamais trouver san nid,
Ch'n'est pas parc' qu'il est bein muchi
Dans un fossé ou tchique còti -
L'coucou, Coucou.

Ch't ouaïsé est hardi pièrcheux,
I' fait un nid servi à deux,
Et d'mêles ou d'grives i' n'a pas d'peux -
Chu coucou, Coucou.


I' pond sen oeu sans embarras,
Et pour li ch'est fini, hélas!
Car i' s'envole et n'érveint pas -
L'coucou, Coucou.

L'ouaïsé à tchi l'nid appartcheint
Accepte chut oeu comme si ch'tait l'sien,
S'acliuque dessus, et tout est bein.
Coucou! Coucou!

Deux s'maines pus tard la cruque se casse,
Né v'chîn la tête qui déhors pâsse,
Et pis les ailes, et toute la mâsse
Du coucou, Coucou.

Lé p'tit a tréjous l'bec ouvert
Pour carpeleuse ou autchun vèr
Qui pouor raide bouonne nouorrituthe sèrt
Au coucou, Coucou.

Gourmand qu'il est, i' n'èrfuse rein ;
N'y'a pas d'dangi qu'i' crève dé faim,
Et certainement i' s'dé hale bein -
L'coucou, Coucou.



Des aut' pétchiots il est l'pus fort,
Et l'scélérat, à tigue dé corps,
Tchique jour pus tard les flianque déhors -
Coucou! Coucou!

Un bieu matîn, au bord du nid,
Iun auprès l'autre l'coucou met l'pid
Et d'là s'envole pour faithe san brit -
Coucou! Coucou!

Quand veint lé s'tembre i' crouaïse la mé
Et va en France passer l'hivé;
I' n'nos aime pas quand i' fait froid,
L'coucou, Coucou.

Mais faut s'attendre, l'année tchi veint,
A ouï le cri, de près et d'yain,
Dé ch't ouaisé que j'connaissons bein
L'coucou, Coucou.

Go to the Learn Jèrriais website to find the audio version of this...

www.learnjerriais.org.je

